



Groupe parlementaire

N° 6780
Entrée le 07.09.2022
Déclarée recevable
Président de la Chambre des Députés
(s.) Fernand Etgen
Luxembourg, le 07.09.2022

Här Fernand Etgen
President vun der Deputéiertechamber
19, um Krautmaart
L-1728 Lëtzebuerg

Lëtzebuerg, de 6. September 2022

Här President,

esou wéi d'Chambersreglement et virgesäit, bieden ech lech, dës parlamentaresch Fro un den Här Energieminister weiderzeleeden.

An der Äntwert op meng parlamentaresch Fro Nummer 5121 huet den Här Energieminister iwwer d'Modalitéiten an d'Tariffer vun der Einspeisevergütung fir d'Bedreiwer vu Photovoltaikanlagen ënner anerem dat hei geschriwwen: *"Den Aspeisetarif gëtt opgrond vun der Nennleeschtung vun enger Anlag an opgrond vum Aspeisejoer ermëttelt. Déi Tariffer sinn am "règlement grand-ducal modifié du 1er août 2014 relatif à la production d'électricité basée sur les sources d'énergie renouvelables" festgeluecht [...] De Maartpräis kënn bei gréissere Photovoltaikanlagen, also ab enger Leeschtung vun 200 kW an d'Spill. Am Cahier des charges vun den Ausschreibungen ass ee "contrat de prime de marché" virgesinn. Den Anlagebedreiwer muss sech selwer ee sougenannten Direktvermarkter sichen dee fir hien de produzierte Stroum um Maart ënnerbréngt. De Reseausbedreiwer bezilt dem Anlagebedreiwer dann nach déi eventuell Differenz tëschen dem Referenzpräis deen d'Anlag iwwer 15 Joer garantéiert huet an dem Maartpräis vum Stroum". Sou wéi et mir zougedroe gouf, huet d'ENOVOS am Kader vun der allgemenger Energiekris viru kuerzem och d'Präisser vun hirem Naturstrom "Nova" ëm 30 bis 40 Prozent erhéicht, obwuel hei keng zousätzlech Käschten duerch Sanktiounen ugefall sinn an ouni dës Präiserhéijung un déi privat Biergerproduzente weiderzeginn.*

An deem Zesammenhang géif ech dem Här Energieminister gär dës Froe stellen:

- 1) Kann den Här Minister déi Virgäng confirméieren? Falls jo, kann den Här Minister präziséieren, op déi genannte Präiserhéijung eleng op nei Zousazkäschten zeréckzeféieren ass an aus wéi enge verännerten Ëmstänn se resultéieren?
- 2) Kann den Här Minister matdeelen, ob de Bedreiwer vum Reseau och verpflichtet ass, Beneficer aus erhéichte Maartpräisser, déi iwwert dem Garantiepräis leie proportional u privat Biergerproduzente weiderzerechen? Kann den Här Minister an deem Zesammenhang präziséieren, ob de legalen Aspeisetarif och réckwierkend zu Gonschte vun de private Biergerproduzente kann ugepasst ginn?
- 3) Kann den Här Minister matdeelen, wéi eng Delaien a Virlafprozedure privat Biergerproduzente mussen anhalen, falls si opgrond vun engem verännerte Maartëmfeld vun der Aspeisung op den Eegekonsum vun hirem privat produzierte Stroum wëllen ëmstellen?

Mat déiwem Respekt,



Fred Keup
Deputéierten



Äntwert vum Minister fir Energie, Claude Turmes, op d'parlamentaresch Fro n° 6780 vum 7. September 2022 vum Här Deputéierte Fred Keup iwwer d'Augmentation du prix de « nova naturstrom »

1) Kann den Här Minister déi Virgäng confirméieren? Falls jo, kann den Här Minister preziséieren, op déi genannte Präiserhéijung eleng op nei Zousazkäschten zeréckzeféieren ass an aus wéi enge verännerten Ëmstänn se resultéieren?

Den éierewäerten Deputéierte freet Detailler vun engem Produit, dee vun enger privater Entreprise um Marché ugebuede gëtt. Ech kann dozou keng Ausso maachen. Et kann een awer ganz allgemeng soen, dass wa Präisser um Stroummarché héich sinn, des Präisser sech op all Produiten erëmspiegelen, egal ob se op erneierbar oder op fossille Sourcë baséieren.

2) Kann den Här Minister matdeelen, ob de Bedreiwler vum Réseau och verpflichtet ass, Beneficer aus erhéichte Maartpräisser, déi iwwert dem Garantiepräis leie proportional u privat Biergerproduzente weiderzerechen? Kann den Här Minister an deem Zesummenhang preziséieren, ob de legalen Aspeisetarif och réckwierkend u Gonschte vun de private Biergerproduzente kann ugepasst ginn?

De garantéierten Aspeisetarif, dee Produzente vun erneierbarem Strom fir hire Strom kréien, ass iwwert eng Lafzäit vu 15 Joer nom Règlement grand-ducal vum 1. August 2014 ("relatif à la production d'électricité basée sur les sources d'énergie renouvelables") festgeluecht a gëtt och net ugepasst.

D'Netzbedreiwler si verpflichtet de Bedreiwler de Strom entsprechend de Modalitéiten an Tariffer vun dësem Règlement ofzekafen a ginn deen awer direkt un e Fournisseur weider. De Fournisseur bezilt de Maartwäert vum Strom, deen all Mount vum ILR (Institut Luxembourgeois de Régulation) festgeluecht gëtt. Wann de Maartwäert vun der produziierter Energie méi niddereg ass wéi déi am Règlement festgeluechten Tariffer, da gëtt d'Differenz iwwert de "Mécanisme de compensation" (MDC) nom Règlement grand-ducal vum 31. März 2010 ("relatif au mécanisme de compensation dans le cadre de l'organisation du marché de l'électricité") iwwerholl.

Ass de Maartwäert vum produzierte Strom méi héich wéi déi am Règlement festgeluechten Tariffer, da gëtt d'Differenz, déi de Fournisseur bezuelt huet an den MDC abezuelt. Dëst ass säit dem Ufank vun der Energiekris de Fall a mëttlerweil sinn op déi Manéier schonn iwwer 50 Milliounen Euro an den MDC gefloss.

Dofir huet d'Regierung am Kader vun der Tripartite, fir Strompräisser fir 2023 op dem Niveau vun dësem Joer ze stabiliséieren, decidéiert fir des Mesure zum Deel iwwert den MDC ze finanzéieren.

3) Kann den Här Minister matdeelen, wéi eng Delaien a Virlafprozedure privat Biergerproduzente müssen anhalen, falls si opgrond vun engem verännerte Maartëmfeld vun der Aspeisung op den Eegekonsum vun hirem privat produzierte Strom wëllen ëmstellen?

Op Nofro bei der Creos, kann de Client seng Demande online maachen. Soubal d'Demande vum Client da bei der Creos agaangen ass, dauert et an der Moyenne 18 Deeg bis dass d'Autoconsommation aktivéiert ass. Technesch muss op der Plaz beim Client an der Reegel näischt geännert ginn.

Lëtzebuerg, den 11. Oktober 2022
(s.) Claude Turmes
Minister fir Energie